

Bringamosa

ARUBA, JUNI 27 - EDICION NR. 19

EDITORIAL

DISCIPLINA

Ora nos usa e palabra disciplina, kiko esaki kiermeen? Disciplina ta regla nan cu nos mes ta siña y siña nos yiunan of esnan cu nos ta educa. Tur caminda tin regla, manera den trafico, na cas, na school. Pero tin diferente manera pa disciplina muchanan. Un mucha di cero pa tres aña su cuero ta manera parti paden di su cerebro. Locual mi kier bisa cu un baby ta reaciona ora bo mishi cu'ne riba su cabes of dune un abraso. Muchanan ta siña di locual nan ta wak. Ora un mucha ta mas grandi dune informacion cu e por usa, papia claro cu'ne y na bo tono e lo compronde cu esaki ta bai pasa. Ora un mucha ta entre tres y ocho aña nan ta compronde mas mihor, lage sa cu bo no a gusta kiko el a hasi. Por ehempel el a kita algo di su ruman y esun ta grita. Semper bai serca esun den e caso aki cu ta grita. Puntre kiko e no ta gusta, y lage bai serca su ruman y bise, mi no ta gusta pa bo kita e cos for di mi. Cu otro palabra bisa e mucha kiko pa hasi y mustre kiko bo kier pa e hasi. Bo ta dune oportunidad pa escohe, bo ta hasi esaki of esey, kiko ta bo escogencia? Nunca no laga bo yiu of un mucha cay, semper bise, ni kiko bo hasi, mi lo no hasi bo dolor. Locual ta masha importante, muchanan tin cu sinti nan mes sigur.

Nos cu ta hende grandi semper ta crea peliger ora nos hasi pa pone otro sinti malo, wak algo robes y duna otro falta cu nos ta rabia. Muchanan te cu siete aña no ta papia den nan mes, manera ora cu nan bira grandi y ta pensa prome cu nan papia. Y locual nos sa cu ta tuma un mucha 2000 biaha pa e siña un habito. Locual nos por bisa ta si bo kier un otro hende cambia, abo mester cambia prome. Esaki ta ensera cambia e miedo den amor, cambia e rechazo pa aceptacion y cambia e alehamento pa incorporacion.

Nos ta curioso pa sa bo opinion.....

Reaccionan ta bon bini na:
Oficina di Asuntonan di Hende Muhe
J.E.Irausquinplein 5



LEY DISCRIMINATORIO PA HENDE MUHE

LEY DISCRIMINATORIO PA HENDE MUHE

Den e edicion aki nos di Bringamosa ta dedica nos mes riba e ley di "Landsverordening materieel ambtenarenrecht (AB 1989 no. GT. 37)".

Den e ley aki cambianan a wordo hasi pero den articulo 40, di tres parti y articulo 94, di dos parti, b tin mester wordo adapta.

Articulo, parti tres ta trata "overlijdingsuitkering" na yiunan, ta wordo menciona yiunan menor di edad legal y yiunan natural reconoci.

Esaki kiermeen letterlijk cu yiunan di un ambtenaar femenina cu no ta casa no por hasi apelacion pa haya e "overlijdingsuitkering". E parti aki ta discriminatorio pa nos hende muhe cu ta ambtenaar cu no ta casa cu yiu no reconoci.

E cambio cu lo cubri tur lo ta si cambia "yiunan natural reconoci" pa "yiunan natural".

Yiunan di criansa of yiunan hijastra y yiunan no reconoci cu solamente tin un onderhoudsplicht, no por hasi apelacion ariba e "overlijdingsuitkering". E yiunan aki si tin derecho riba pensioen di huerfano y pa e yiunan aki si un ambtenaar ta haya kindertoelage.

E conclusion ta cu e formalisacion den articulo 40, parti tres, mester wordo adapta. Y tambe mester palabra si yiunan di criansa y yiunan hijastra ken ta existi un onderhoudsplicht, por apela riba e "overlijdingsuitkering".

Pa mas informacion por yama Oficina di Asuntonan di Hende Muhe na tel: 831351 of por pasa personalmente na J.E.Irausquinplein 5, Oranjestad (Centro Educativo Christian, prome piso, prome porta).

Si bo tin sugerencia of pregunta, yama nos libremente!!!!!!

Tel: 831351/ Fax: 831352

